

«Jau na poss betg dir gea»

Per il deputà Jon Pult nun han gieus olimpics in effect positiv e durabel per l'economia

CUN JON PULT HA DISCURRÌ
ANDREAS CADONAU

■ **In mister olimpia nun han ils promoturs da la candidatura per gieus olimpics en il chantun Grischun. Persuenter è il deputà Jon Pult sa plazza sco mister antiolimpia grischun.** El ha fatg attent a l'istorgia dals Gieus olimpics che sajan adina vegnids in bun tant pli chars che budgetads e renviescha la pretensiu dad in effect positiv dals gieus sin l'economia. Il deputà da la Partida socialdemocratica rinfatscha a la politica ed economia grischuna mancanza da strategia per dumagnar las sfidas actualas e da sulet reactivar ideas veglias.

Ina da Vossas pretensiuns han ils promoturs da la candidatura per ils Gieus olimpics adempli. Il concept da la candidatura è sin maisa, ha quel midà Voss parairi persunal?

Jon Pult: Jau sun sa decidì da vuschar cunter il credit da planisaziun en il cussegl grond sin fundament da las infurmaziuns ch'eran avant maun il december passà. Là hai jau crititgà la mancanza dal concept da basa. Uss è el a disposiziun, ma jau stoss dir che quest concept è uschè nausch che jau rest tar mes na. Jau sun anc pli segir ch'il na è gist. Quest concept cuntegn chaussas uschè absurdas che jau na poss betg dir gea. Per exempel il plaz dal teater a Cuira che duess daventar plazza da surdar medaglias per 7500 aspectaturs. Per las preschentaziuns publicas per ils campionadis da ballape restrenscha la polizia il dumber maximal sin questa plazza sin 1800 persunas, quai per menziunar sulet in exempel.

Cuntegn chaussas absurdas

Ils promoturs pretendan da pudair organisar gieus che custan 1,6 milliardas francs e che portan finanzialmain sasezs?

Tut ils Gieus olimpics ch'i ha dà ils davos 60 onns èn stads bler pli chars ed han chaschunà deficits bler pli gronds. Ina illusiun da pretender ch'i saja pussaivel da realisar gieus che portan sasezs. Quai mussa l'istorgia dals gieus. A la fin èsi adina vegnì pli char. E pertge? Il model da fatschenta dal Comité olympic internaziunal (COI) sa basa sin gieus uschè chars sco pussaivel per pudair profitar maximalmain. Ils custs vegnan adina purtads da la populaziun.

Il COI è sut squitsch, il pievel ha renvià Gieus olimpics sco per exempel a Minca u Oslo. Bain ina schanza per ils promoturs grischuns?

Il COI è bler memia pauc sut pressiu. In n'exista betg ina reacziun reala dal COI pertutgant gieus durabels ed economics. I dat ina reacziun communi-



Vul vinavant savair nagut da Gieus olimpics en il chantun Grischun: Il deputà socialdemocrat Jon Pult.

FOTO M. HARTMANN

cativa da reclama cun quella agenda 2020 per far la parita da midar insatge. Tut ils parameters èn dentant stads ils medems. Per ils Gieus olimpics 2026 èn planisadas dapli disciplinas che per ils gieus da Sotschi. Nua è pia la redimensiu propagada? L'agenda 2020 cuntegn sulet propostas nunliadas, dad ina vaira refurma è il COI lunsch davent?

Vus essas s'exprimids da nun esser da principi cunter Gieus olimpics. Nua sa chatta Vossa basa da collavurar ad ina candidatura?

Jau pudess m'imaginar da collavurar per in project che cumpiglia l'entira Svizra, gea schizunt forsà l'Austria uschia ch'ins po propi desister da construir insatge nov, in concept totalmain auter. La proposta actuala sco las premissas dal COI èn actualmain anc lunsch davent dad in tal concept.

Ina refurma è lunsch davent

Ils promoturs grischuns pretendan gist quai, numnadamain da desister da nova infrastruttura e da preschentar in concept economic e durabel?

Gea, cun construcziuns provisoricas per 220 milliuns francs. Quai èn las dimensiuns. Cun circa la summa dal preventiv annual da la citad da Cuira vulan ils promoturs dals Gieus olimpics fabritgar provisoris per trais emnas. Quai mussa gia il gigantissem e l'absurdità da l'entier project.

La candidatura vala sco program d'impuls per l'economia grischuna?

Mia tesa è quella ch'ils Gieus olimpics fan mal a l'economia. E mia tesa è documentada da l'istorgia da 60 onns Gieus olimpics. I dat massa studis da renumads instituts che mussan che olimpia na dat betg in impuls positiv a l'economia. Anzi, ins fa grondas investiziuns per in curt temp e quell'investiziun vegnan dimensiuadas per trais emnas cun fitg blera gliued e quai stgaffescha surcapacitads ch'effectueschan custs che la publicità sto pagar la finala. Jau sun clera-main da l'avis che Gieus olimpics sajan in problem per l'economia. Sviluppar l'economia vul dir sviluppar projects ed infrastrukturas, ideas e firmas che fan insatge concret en ina grondezia che fa senn.

Adina pli char

L'idea è da stgaffir infrastrukturas durablas a lunga vista, per exempel ina colliaziun directa al port aviatic da Kloten?

Impussibel, la colliaziun infrastrukturala exista gia oz. Ella na vegn dentant betg duvrada da las Viafiers federalas, e pertge betg? La viafier dovra dapli binaris e tras-sés en direcziun da la Svizra occidentala e vers Lucerna. Las frequenzas vers Cuira èn memia pitschnas. Cler, durant las trais emnas dals Gieus olimpics duvrass ins quella infrastruktura e suenter restass pussè il medem urari sco enfin uss. Ina illusiun dals promoturs sche betg ina sflida da pretender ch'i dess nova infrastruktura. In nov binari custass diesch milliardas francs ed el na fiss betg terminà sin l'onn 2026, era sch'ins cumenzass oz a construir. Illusiuns totalas.

Nagins aspect positivs da Vossa vart vers la candidatura?

Jau poss resguardar l'argument che Gieus olimpics èn buns per tut ils sportists e per tut la gliued che vul guardar sport. In argument che jau respect. Economicamain e finanzialmain vegnan derasadas suletta-main illusiuns. Jau stoss rir in pau è na poss betg prender tut serius sche jau aud *Reto Gurtner* ed *Andreas Wieland* che argumentavan avant quatter onns exact sco jau uss. Da preschent èn els sa vulvids per 180 grads.

La dumonda al pievel grischun sa drizza sulet per in credit da planisar la candidatura?

La dumonda è simplamain sch'il pievel grischun vul dar ora 25 milliuns francs, respectiv nov milliuns dals agens meds finanzials per elavurar in plan nua che la probabilitad è fitg gronda ch'il project elavurà posseda bler dapli ristgs che schanzas. Jau na sun betg pront da dar ora quests nov milliuns francs. Cun nov milliuns pon ins far bier. Per exempel a favur da la cultura grischuna. Pertge dar ora nov milliuns per in project cun gronds ristgs ch'ins nun è segir sch'ins vegn insumma da realisar el.

L'economia grischuna è sut pressiu, las perspectivs finanzialas en pauc empermettents, il fatg n'è betg da snegar?

Na, schain uschia, parts da l'economia grischuna han problems. Il turissem ha problems principalmain pervia da dus facturs. Il franc svizzer è memia ferm, ils pretchs èn memia auts vers ils giasts da l'exteriur. Vi da quel problem na midan Gieus olimpics insumma nagut. Cuntrari, els creesch tendenzialmain pli auts custs e pli auts pretchs. Noss turissem è fixà bler memia ferm sin il turissem d'enviern, noss focus dapi blers onns. A lunga vista è quai ina flaiveltezza, quai savain nus tuts. Nus stuessan diversifitgar noss turissem e betg focussar tut anc ina giada sin il sport d'enviern cun Gieus olimpics en in mar-

tgà che daventa pli pitschen. Perquai èn ils Gieus olimpics momentan la faussa medischina per il turissem.

La faussa medischina, davart dals exponents dals Gieus olimpics da Lillehammer tuna quai in pau auter?

Lillehammer n'enconuscheva nagin avant ils Gieus olimpics e grazia als Gieus olimpics è Lillehammer sa posiziunà sco lieu turistic. En il Grischun è quai auter, tut ils lieus che fan part dal project olympic èn gia destinaziuns turisticas e San Murezzan, Tavau u Laax n'èn betg memia pauc enconuschents. Lur problem è ch'els èn memia chars. Tar Lillehammer ston ins era menziunar las varts negativas. Ils Gieus olimpics han chaschunà là in deficit tranter ina milliarda ed ina milliarda e mez. Creà han il gieus a lunga vista 500 plazzas da lavur. Segir bun, 500 plazzas da lavur, dentant crear 500 plazzas da lavur cun passa ina milliarda francs. Quai èn plazzas extrem charas. Lillehammer è tuttina la meglra candidatura visavi las ulteriuras experiencias dals davos decennis, dentant cun ina situaziun speziala e sch'ins resguarda las cifras betg positiva.

Pia schar pender las alas e dir ina giada dapli na?

Co dir gea sche las medemas persunas vegnan mintga tants onns cun las medemas ideas. L'idea da realisar Gieus olimpics en il Grischun è veglia ed è vegnida activada pliras giadas suenter l'onn 1948 cu San Murezzan ha organisà ils davos Gieus olimpics en il chantun Grischun. Simtomatic per mai ed il mussament che l'economia ed il turissem han vairamain in problem. Naginas novas ideas, persuenter turnar adina pussè cun il vegl. Ed alura vegnan els narrs vers quels che dian na e ch'èn da l'opiniun che l'idea saja nauscha.

Derasar illusiuns

Sulet dir na tanscha dentant betg?

Jau hai mai chapì ch'il turissem grischun, da cuminanza cun il turissem svizzer, na fa betg pli gronda pressiu sin la Banca naziunala per ina autezza minimala dal curs da l'euro e lu ston ins sa dumandar a lunga vista sch'igl è bun per l'artg alpin svizzer da na far part da l'euro. Cun il franc avain nus in problem e nossa autonomia custa adina dapli. Sa chapescha che quai èn dumondas complexas ch'il chantun Grischun na po betg decider persul. Ils represchents da la politica e da l'economia grischuna stuessan plaunsieu elavurar e purtar strategias sin level naziunal. Uschè ditg che la maiorità d'els crai che Olimpia saja la suletta schliaziun è ina discussiun impussibla.

La discussiun davart l'euro e la participaziun da la Svizra è in tabu?

In tabu momentan e sch'ins fa da quell'as ponderaziuns valan ins bainprest per in traditur da la patria.